

《三時繫念佛事》白文

P8 覺海虛空起。娑婆業浪流。若人登彼岸。極樂有歸舟。		
P8 法王利物。悲智宏深。普遍十方。冥陽靡隔。 今蒙齋主某恭為某屈逢某之期。特請山僧登座。依憑教法。作三時繫念佛事。迺爾亡靈。遭此勝緣。自宜嚴肅威儀。來臨座下。恭臨妙法。一心受度。		
P9 此一瓣香。根蟠劫外。枝播塵寰。不經天地以生成。豈屬陰陽而造化。爇向爐中。專伸供養。常住三寶。剎海萬靈。極樂導師。阿彌陀佛。觀音勢至。清淨海眾。悉仗真香。普同供養。		
第一時法事 P11	第二時法事 P36	第三時法事 P59
二、繫念彌陀/提綱開示 P23.48.71		
世界何緣稱極樂。只因眾苦不能侵。道人若要尋歸路。但向塵中了自心。	便就今朝成佛去。樂邦化主已嫌遲。那堪更欲之乎者。管取輪迴沒了時。	十萬餘程不隔塵。休將迷悟自疎親。剎那念盡恆沙佛。便是蓮華國裏人。
心心即佛。醍醐酥酪。咸自乳生。佛佛惟心。釵釧瓶盤。盡從金出。十萬億程。東西不隔。二六時內。凡聖同途。低頭合掌白玉毫。星明日麗。歌咏讚揚紫金容。霆震雷轟。清涼月兮有水皆含。功德雲而無山不戴。香象渡河。一舉洪名超二死。迦陵出穀。千稱嘉號壓羣音。下情唯忖以難思。一念回光而易往。究竟不居心外。分明只在目前。審如是。即今眾等。繫念彌陀。三時佛事。只如不涉證修。親蒙授記一句。如何舉揚。	原夫徧十方是極樂世界。山光水色。似空合空。盡大地是清泰故鄉。華笑鳥啼。如鏡照鏡。自是不歸歸便得。五湖煙景有誰爭。黃金臂晝夜常垂。惟許行人獨委。白玉毫古今不昧。全憑願者承當。所以道。萬法是心光。諸緣惟性曉。本無迷悟人。只要今日了。即今現前眾等。繫念第二時佛事。且了之一句。如何舉揚。	合塵背覺。栽荊棘於七寶園林。捨妄歸真。列珠網於四生門戶。縱橫萬法。圓裏一心。非思量處。阿彌陀佛。坐斷六根。無造作時。清泰故鄉。橫吞八極。破群昏如杲日麗天。療眾病如善見神藥。所以云。一稱阿彌陀佛名號。能滅八萬億劫生死眾苦。利益如是。豈譬喻言說之可及乎。只如即今繫念。第三時佛事。且道現前眾等。同聲相應一句。如何指陳。
風吟樹樹千般樂。香浸池池四色華。	瑠璃池上懸明月。齒 ₅ 茗 ₂ 華間戲水禽。	一從佛向舌根念。不覺華隨足底生。
三、功德堂說法/講演 P26.50.76		

諸苦盡從貪欲起。不知貪欲起於何。
因忘自性彌陀佛。異念紛馳總是魔。

教中道。生而無生。法性湛然。無生而生。業果儼然。所謂生者。即眾生生滅之迹也。謂無生者。即諸佛寂滅之本也。法性湛然者。靈明湛寂。元妙真常。箇箇不無。人人本具。只因最初不覺。忽爾動心。認妄為真。迷己逐物。由是業網牽纏。流轉五道。恆隨生死以升沈。互古至今而靡閒。當知生自緣生。而法性不與緣俱生。滅自緣滅。而法性不與緣俱滅。所以云。法性湛然。是謂生而無生者也。無生而生者。眾生迷妄入心。積業成果。虛受輪轉。妄見生滅。於法性體上。如鏡現像。似珠隨色。當知鏡光本淨。珠體絕痕。物境互彰。不違色像。彼色像之去來。猶業果之儼然也。故諸佛於儼然生滅中。唯見無生。眾生於湛然無生中。唯見生滅。只因迷悟之有差。逐致現量之不一。實乃生無自性。無生亦無自性。悟則生滅皆無生。迷則無生皆生滅。所以離此別無。是乃一體而異名也。審如是。則阿彌陀佛即是我心。我心即是阿彌陀佛。淨土即此方。此方即淨土。豈非迷悟之自殊。何有聖凡而彼此。乃知現前眾等。以自性阿彌陀。與大眾舌根。普同運轉。根本法輪。

是心是佛將心念。念到心空佛亦忘。
撒手歸來重檢點。華開赤白與青黃。

教中道。惟心佛亦爾。惟佛眾生然。心佛及眾生。是三無差別。所謂心者。心有多種。曰肉團心。乃現在身中父母血氣所生者是。曰緣慮心。即現今善惡順逆境界上種種分別者是。曰靈知心。是混千差而不亂。歷三際以靡遷。炳然獨照。卓爾不羣。在聖不增。在凡不減。處生死流。驪珠獨耀于滄海。居涅槃岸。桂輪孤朗于中天。諸佛悟之。假名惟心。眾生迷之。便成妄識。是以佛即眾生。眾生即佛。且心外無佛。亦無眾生。唯迷悟之有間。故凡聖而迥異。豈知心佛眾生。三無差別。永嘉云。夢裏明明有六越。覺後空空無大千。既然如是。則經云。從是西方。過十萬億佛土。有世界名曰極樂。其土有佛號阿彌陀。今現在說法。總不出唯心淨土。本性彌陀也。由是而知。即今現前亡過(某)其生也蓮華朵朵。其歿也行樹重重。無一時不達蓮邦。無一念不依慈父。審如是。且道離此心佛眾生外。別有商量處也無。

打破虛空笑滿腮。玲瓏寶藏豁然開。
直饒空劫生前事。六字洪名畢竟該。

古人道。清珠投於濁水。濁水不得不清。念佛投於亂心。亂心不得不佛。西天有寶。名曰清珠。謂此珠。投入濁水中。入水一寸。則一寸之濁水。即便清潔。此珠入水。自寸至尺。乃至於底。則濁水亦隨之而澄湛。當知清珠者。喻念佛之淨念也。濁水者。喻雜亂之妄心也。當妄心雜亂之頃。能舉起一念。如對慈尊。按定六字洪名。一一出口入耳。則此雜亂。自然隨念寂靜。自是一念。而至十念。乃至念念不移。即教中所謂淨念相繼者也。念佛之人。須要信心懇切。正因凜然。重念死生輪轉之可悲。深厭塵勞紛擾為可痛。舉起一聲佛名。直下更無異見。如太阿劍。橫按當軒。如火火輪。星騰燄熾。萬物撻之則燎。觸之則傷。直至一心不亂。能所兩忘。到家之說。不容再舉。捷徑之詞。何勞挂齒。可謂證修行之神術。超方便之正途。破死生蟄戶之雷霆。燭迷妄幽衢之日月。今宵三時繫念佛事將圓。亡靈(某)承茲上善。決定往生。且道一念未萌以前。還有者箇消息也無。鳴尺。

諸仁還委悉麼。		
生滅無生生不生。樂邦那肯禁人行。 誰知萬丈紅塵裏。菡萏華開月正明。	大圓鏡裏絕纖埃。碧藕華中有聖胎。 遙望金沙池沼外。寶光常照玉樓臺。	是心空寂念何依。故國云歸孰未歸。 華外玉雞啼曉日。遠迎新佛奉慈威。
四、懺悔發願/白文開示 P31.55.81		
<p>人人分上。本有彌陀。箇箇心中。總為淨土。了則頭頭見佛。悟來步步西方。</p> <p>上來啟建三時繫念淨業道場。今當第一時佛事已圓。</p> <p>如上殊勳。投入彌陀大願海中。專為亡靈(某)。求生淨土。</p> <p>但念自從無始。迄至今生。一念違真。六根逐妄。隨情造業。縱我為非。身業則殺盜邪淫。口過則妄言綺語。兩舌惡口。意惡則常起貪瞋。深生癡愛。由茲三業。鉤鎖妄緣。常汨汨於塵勞。但茫茫於歲月。</p> <p>欲思出離。唯憑懺悔熏修之力。俾眼耳鼻舌身意之過愆。應念頓消。使色聲香味觸法之浮塵。即時清淨。</p> <p>又極樂求生。全憑發願。仰勞法眾。異口同音。敬為亡靈。至心懺悔發願。</p>	<p>蓋聞虛而有鳴答之聲。寂而無形影之相。</p> <p>然谷響自然。非呼之而不答。佛身無作。非扣之而不彰。</p> <p>上來啟建第二時繫念佛事已圓。如上殊勳。投入如來大願海中。出生功德。端為亡靈(某)洗除業垢。增長善根。捨此報緣。往生淨土。</p> <p>但念自從無始。迄至今生。漚生巨海。逐識浪以高低。雲點太清。任情風而人我。於是循環諸趣。流轉四生。業海茫茫。罪山岌岌。匪憑發露。曷遂消除。懺摩已往。發願當來。再勞法眾。至心懺悔發願。</p>	<p>念佛既從心出。結業豈屬外來。須臾背念佛之心。剎那即結業之所。</p> <p>今則眾等。依憑教法。作三時繫念佛事。所集勝因。專為亡靈(某)決生淨土。</p> <p>自今戒香馥郁。慧炬熒煌。迷雲開而性天獨朗。妄塵盡而心地廓通。諸根圓淨。群業頓空。一舉念。一華開。挹露迎風。香浮玉沼。一馳情。一果熟。含煙對日。影落金園。經行坐臥在其中。游戲逍遙非分外。得佛受用。徹法源底。常寂光處處現前。大願王塵塵契會。更為亡靈。至心懺悔發願。</p>
〈懺悔偈 1〉	〈懺悔偈 2〉	〈懺悔偈 3〉
往昔所造諸惡業。皆由無始貪瞋癡。 從身語意之所生。今對佛前求懺悔。	往昔所造諸惡業。皆由無始貪瞋癡。 從身語意之所生。一切罪障皆懺悔。	往昔所造諸惡業。皆由無始貪瞋癡。 從身語意之所生。一切罪根皆懺悔。
〈四弘誓願 1〉	〈四弘誓願 2〉	
眾生無邊誓願度。煩惱無盡誓願斷。 法門無量誓願學。佛道無上誓願成。	自性眾生誓願度。自性煩惱誓願斷。 自性法門誓願學。自性佛道誓願成。	

上來懺悔發願已竟(鳴尺)。亡靈(某)當知。夫淨土之為教也。仰承阿彌陀佛。四十有八。大慈大悲。深重願力。攝取十方一切眾生。凡具信心者。皆得往生。

信者。信有西方淨土。信有阿彌陀佛。攝取眾生之事。我等眾生。信有往生之分。然雖謂彌陀攝取眾生往生。要信唯是隨心自現。感應道交。究竟非從外得。如是信者。是為真信。信而無行。即不成其信。

行者。楞嚴經云。都攝六根。淨念相繼。不假方便。自得心開。

阿彌陀經云。若有善男子。善女人。聞說阿彌陀佛。執持名號。若一日。若二日。乃至七日。一心不亂。其人臨命終時。阿彌陀佛。與諸聖眾。現在其前。是人終時。心不顛倒。即得往生阿彌陀佛極樂國土。如是行者。是名正行。行而無願。即不成其行。願者要與阿彌陀佛。四十八願。願願相應。是為大願也。

信行願三。如鼎三足。缺一不可。今爾亡靈當知現前一念。本自圓常。信行願。原是自己本來具有。如是性德。今者但是本性光明顯發耳。

上來懺悔發願已竟。具行猶人具眼目。願如日月燈光明。

依光照燭見分明。行者方能達前境。是以念佛之人。若不發願往生。縱有功行。亦成虛設。以不順佛故。今爾亡靈。當知此意。

上來三時繫念。阿彌陀佛。萬德洪名。勸導亡靈。(某)懺除結業。發願往生。行願既深。功無虛棄。惟願亡靈。聞斯法要。信受奉行。從是托質蓮胎。永離業海。直證阿鞞跋致。圓滿無上菩提。